



SIARAN AKHBAR

KEMENTERIAN KESIHATAN

PERUTUSAN

YANG BERHORMAT
DATO SERI SETIA DR HAJI MOHAMMAD ISHAM BIN HAJI JAAFAR
MENTERI KESIHATAN
SEMPENA HARI JURURAWAT DAN BIDAN ANTARABANGSA

12 MEI 2024

TEMA:

“JURURAWAT KAMI. MASA DEPAN KITA. KUASA EKONOMI PENJAGAN KESIHATAN”

(Our Nurses. Our Future. The economic power of care)

1. Setiap tahun, Hari Jururawat Antarabangsa atau *International Nurses Day* (IND) disambut pada 12 haribulan Mei dan Hari Bidan Antarabangsa atau *International Day of Midwife* (IDM) disambut pada 5 haribulan Mei. Di Negara Brunei Darussalam, Hari Jururawat Antarabangsa dan Hari Bidan Antarabangsa ini digabungkan dan diraikan serentak pada setiap 12 haribulan Mei dan ianya dinamakan sebagai Hari Jururawat dan Bidan Antarabangsa atau *International Nursing and Midwifery Day* (INMD).
2. Tema Sambutan Hari Jururawat dan Bidan Antarabangsa pada tahun ini disediakan oleh International Council of Nurses (ICN) iaitu **“Jururawat Kami. Masa Depan Kita. Kuasa Ekonomi Penjagaan Kesihatan *(Our Nurses. Our Future. The Economic power of care)*”**. Tema ini dipilih bagi menekankan tentang pelaburan dalam sektor kejururawatan yang mampu mempengaruhi dan membawa

manfaat kepada ekonomi dan masyarakat secara amnya.

3. Bidang kejururawatan dan bidan adalah tulang belakang kepada penjagaan kesihatan yang telah banyak berkembang, daripada memberi perkhidmatan '*bedside nursing care*' kepada jenis tugas-tugas yang lebih kepada '*highly technical and advanced*'. Bidang ini juga adalah satu profesion yang sangat mulia yang perlu kita lindungi, hormati dan hargai. Jururawat adalah kunci kepada komuniti yang lebih sihat, masyarakat yang responsif dan ekonomi yang berkembang maju. Namun demikian, penggubal dasar, pentadbir penjagaan kesihatan, dan juga orang awam sering tidak menyedari mengenai pulangan pelaburan (*return of investment*) yang boleh dicapai dengan pembiayaan yang mencukupi ke dalam sektor kejururawatan dan bidan. Kini tiba masanya untuk pembuat dasar dan pembuat keputusan untuk mengambil langkah tegas untuk membina dan mengoptimumkan tenaga kerja kejururawatan yang berkekalan, kuat dan mampan. Terdapat beberapa tindakan dasar telah disarankan oleh Piagam ICN untuk Perubahan (*The International Council of Nurses' Charter for Change*) bagi menjadikan jururawat dan bidan dilindungi dan dihargai seperti berikut:

- a. **Lindungi dan melabur dalam profesion kejururawatan** untuk membina semula sistem kesihatan yang boleh mencapai Matlamat Pembangunan Mampan dan Liputan Kesihatan Sejagat untuk meningkatkan kesihatan global.

- b. Segera menangani dan meningkatkan sokongan untuk kesihatan dan kesejahteraan jururawat dengan memastikan keadaan kerja yang selamat dan sihat serta menghormati hak mereka.
- c. Membangunkan, melaksanakan dan membiayai rancangan tenaga kerja kejururawatan dengan mengambilkira objektif pembekalan bakal jururawat yang mencukupi.
- d. Melabur dalam program pendidikan kejururawatan yang berkualiti tinggi dan bertauliah untuk menyediakan lebih ramai jururawat baharu dan memajukan pembangunan kerjaya sedia ada jururawat.
- e. Membolehkan jururawat bekerja dengan sepenuhnya mengikut skop amalan kejururawatan dengan cara mengukuhkan dan memodenkan peraturan serta melabur dalam *advanced nursing practice* dan model penjagaan yang diterajui jururawat (*nurse-led model of care*).
- f. Mengiktiraf dan menghargai kemahiran, pengetahuan, sifat dan kepakaran jururawat.
- g. Melibatkan persatuan kejururawatan kebangsaan secara aktif sebagai rakan kongsi profesional dan penyampai suara

kejururawatan yang berpengalaman dan dipercayai dalam semua aspek dasar penjagaan kesihatan, sosial dan kepimpinan.

4. Pihak Kementerian Kesihatan sentiasa berusaha untuk memperkukuhkan lagi perkhidmatan kejururawatan di negara ini. Antara inisiatif yang telah dilaksanakan dalam meningkatkan kualiti penjagaan pesakit menerusi penekanan *International Patient Safety Goals* (IPSG) sebagai *Key Performance Indicator* (KPI) dalam penilaian penjagaan kejururawatan. Ini adalah kesinambungan daripada inisiatif yang telah diungkayahkan pada tahun lepas iaitu penyediaan sistem pemantauan klinikal jururawat yang lebih komprehensif dengan menekankan *Patient Safety* di setiap pelaksanaan penjagaan dan perawatan kepada pesakit selaras dengan dasar-dasar yang telah disediakan oleh Kementerian Kesihatan. Seluruh warga Kejururawatan telahpun dilibatkan sama di dalam pembinaan dasar *International Patient Safety Goals* (IPSG) supaya ianya dapat mendokong matlamat tersebut dan seterusnya diserapkan kepada semua lapisan Jururawat dan Bidan di negara ini.
5. Akhirnya, Sambutan Hari Jururawat dan Bidan Antarabangsa pada tahun ini adalah masa yang sesuai untuk kita membuat perubahan dan membentuk semula persepsi orang ramai mengenai sumbangan jururawat dan bidan dalam penjagaan kesihatan ke arah kejayaan

ekonomi dan masyarakat secara keseluruhan. Dalam masa yang sama, saya juga menyeru kepada semua Jururawat dan Bidan di negara ini untuk sentiasa bersabar, memberikan layanan yang sempurna dan mengekalkan dedikasi yang tinggi dalam menjalankan tugas seharian. Kementerian Kesihatan percaya jururawat dan bidan yang bertanggungjawab dan prihatin mampu menjadikan sistem kesihatan di negara ini mampan dan berkualiti tinggi yang seterusnya dapat memacu kepada perkembangan ekonomi dan masyarakat sesuai dengan tema sambutan ***'Our Nurses. Our Future. The economic power of care'***.

-TAMAT-